

متعلق مسائل حقننده بیان افکاره واسطه اولانلردر: بوقیلدن اوله رق «حسین فلاح» نام اثرده مسئله زراعیه دن، «حسن فلاح» نام رومانده قوه مجریه عثمانیه نك احوال ماضیه سندن بحث اولنیور. «احمد متین و شیرزاد» نامیه صوک دفعه اوله رق موقع استفاده عامیه وضع ایتمش اولدقلری رومانده «احمد» نامنده اصیل برکنج، «شیرزاد سلجوقی» نك سوانح ایام حیاته غبطه ایدوب برکمی استیجار و آناتولی، جزایر بحر سفید، یونانستان، سچیلیا سواحلی کبی «شیرزاد» نك فتوحاتیه مشتهر بولنان اقلیمک هر برینه سفرلر اختیار و بازیچه امواج دریا اوله رق بر مدت مجراً کشت و کداز ایدیور. اثنای شب دلفروزده، برزمان را کب اولدینی سفینه نك خلاطریه، بر زمانده یونان قدیم خرابه لرینه یاخود قرب دریاده مرکوز اولان سنکپاره لره اتکا، بعضاده آنه نك منتظم جاده لرینی یاخود ایتالیانک ایشلک ایمانلرینی سیر و تماشا ایدهرک، «احمد»، رفیق سیاحتی بولنان افلاق اهالی سندن رفیق الفؤاد بر دختر پاکیزه نهاده، هر بروقه سی شون معظمه اسلامیه نك ادوار ماضیه سنی تجدید و مانی سعادات ملیه یی قبلرده تشید ایده جک صورتده سرگذشت شیرزادی نقل و تصویر ایللیور.

احمد مدحت افدینک مسلك حکیمانه سنه کانیجه: مشارالیه وسائل نجات و سلامتک انحق حوزه مقدسه اسلام و شریعت مطهره حضرت خیر الانامده بولنه بیله جکفی تصدیق و اعتراف ایله برابر، عن اصل هند منابعندن ترشح ایدهرک تدریجاً آسیا خلقنک عروق و اعصابنه قدر نفوذ و جریان ایدن عطالت و بطالت مشربی ده شدتله رد ایدر. مدحت افندی کندی فکر حکیمانه سنجه، چالیشهرق حیاتک بتون ورطه لرینی آناتوق، عالمک هر بر هیئتنی کورمک، هر بر فنی، هر بر فکری تبع و مطالعه ایتمک، معرفت الهیه یه وصول ایچون اک

مستقیم طریق اولدینی آثارنده اشرا بایدر. مشارالیه، «نصل یاشمالی؟» سعی و عمله محبت کبی اخلاقه متعلق اثرلریله مرحوم ناجی افندی یه خطاباً نشر ایتمش اولدینی فلسفیه متعلق مکتوبلرنده موضحاً بسط و بیان اولنان بوفلسفه مثبتة احکامی، عالم ادبیاته اعلا ی نام و شان و اجراز شرف بی پایان ایتسه سنه بادی اولدینی کبی، «نوم و حالات نوم» عنوانیه چکیده خامه معجز بیانی اولان اثرکزین مسلك فنونده، «ضابط» و «ادوار عسکریه» ناملریله یازدینی ایکی ممتاز اثر سلاک عسکریده، «قولبر» و «حل العقد» اسملری تحتیده ممالک مقمنده اکثریتله مرعی الاجرا اولان (مبادله) اصولنه اعتراض و (حمایه) اسلوبی مدافعه و التزام یولنده تحریر و نشر ایتدیکی دیگر اثرلر فن اصول اداره و الحاصل قاعده تعلیم و تعلمه دار یازمش اولدقلری متعدد آثار نفیسه ده تربیه اطفال عالنده حائز اولدقلری بهره اقتدار و کمالی مرتبه ثبوت ایشال ایتشدیر.

آثاری ۱۳۰ جلدن مرکب بر کتبخانه تشکیل ایده جک قدر کیتلی اولدینی حالده، احمد مدحت افدینک هنوز سن عالیرلی الی اوچی متجاوز اولمادینی وقوای بدنیه لرینک کاملاً برقرار اولدینی نظر دفته آله جق اولور ایسه، آتیا ادبیاتمه بوکبی دهاک چوق خدمات مبروره ابرازیله منتسبین فضل و عرفانی جداً مستفید ایده جکلرینه امیدلر حاصل اولیور. (مابعدی وار)

﴿قیزلرک تعلیم و تربیه سی [۱]﴾

کنج قیزلرک پرورش یاب علم و ادب اولملری آرزو ایدلریکی حالده اهمیتی بالخاصه انلرایچون [۱] (نه قونان) مکتبنک انشاسنه باشلانمازدن اول فرانسه ادب سندن برینک قله آلدینی مقاله نك ترجمه سی.

یایله جق دارالتدریسه مبالغ و فیره صرفنه دکل بلکه مداومینک بحق تعلیم و تربیه سی جهته ویرمیلی.

قیزلره اول باول عقائد دینیه لرینی اوکرتیلی. زیرا قیزلر ایچون یاییلان اوقیلر تأسیسات عمومیه ده مسائل دینیه تدریسات سارویه مر جحدر.

هر نه دینیرسه دینسون، بر قیز مسائل دینیه واقف اولورسه ایلورده هم والده سی همده زوجی استفاده ایدر. بناء علیه قیزلرک صاحب افکار دقیقه اولملرینه اعتنادن ایسه اعتقادات مذهبی لرینک یولنده اولمه سنه دقت درجه وجوده در.

بر مکتبدن نشأت ایده جک قیزلرک صاحب حسن و آن بولملرینی آرزو ایتدم؛ فاضله اولملرینی تمی ایدرم. اخلاق ملکانه یه، قلوب عالییه مالک اولان قیزلرک افکار دقیقه، روی دلستانه صاحب بولنانلردن دها زیاده بختیار اوله جکلرنده قطعاً اشتباه ایدلمه سون.

قیز مکتبلرینه تعیین اولنه جق مدیرل عقللی، مسن و تمیز اخلاقی اولمالی. طالباته عبادت ایتدیرمیلی. علم حال تدریسنه پک اهمیت ویرمیلی.

عقائد دینیه لر یولنه کیرنجه حساب، یازی، لسانک قواعد صرفیه و نحویه سنی اوکرتدکن صوکره بر آزده جغرافیا ایله تاریخ کوسترمیلی.

السنه اجنبیه دن هیچ برینی تدریس ایتمه میلی. سنی بر آز زیاده اولان قیزلره: «نباتات، حکمت، تاریخ طبیعی» علوه نندن معلومات مجمله اعطا اولنه بیلیر سده شو جهتی ده نظر دقتدن دور طوتمامیلی:

یوقاری صنفده بولنان قیزلری: «چوراب اورمک، دیکیش دیکمک، کرکف ایشله مک» کبی قادیلره مخصوص ال ایشلریله کونده سکر ساعت قدر اشغال ایتمیلی. طبقات

عالیه منسوب قیزلرک دیدیکم ال ایشلرندن
استثناسی جهتی متبادر خاطر اوله بیلیرسه ده
جهیت بشریه نك شیرازه انتظامی خللدار
ایده جک بوفکر، حیت ملیه سی اولانلرجه
مردوددر!

قیزلره علم طبدن، اجزاجیلقدن معلومات
اعطاسی ده ممکن اوله بیلوب اوله میسه جغنی
بیلهم. فقط، شو دنیای ذی الطبعده بولنان
انسانلرک احوال آتیه سی مجهول اولدینی
جهتله قیزلرک «یک پیشیره» دن بی خبر
اوله لرینه کوکلم بردرلو راضی اوله میور.

دیمک ایسترم که مأذون اوله جق قیزلر،
برینه تزویج ایلدیک زمان ملبوساتک
کافه سی دیکمه، تعمیر ایتمه، چوجوقلرینه
قونداق بزى یایه ییلمک، اوک ایچنده برى
خسته لاندینی زمان باشی اوچنده الندن کلدیکی
قدر خدمت ایله مکه مقتدر اوله لیدرلرکه بونک
ایچونده اوله مطالعات عمیقیه احتیاج مس
ایتمه چکی آشکاردر.

قیزلرک وعلى العموم قادینلرک اکتسا
ایده جکلری البسیه کانجه: الحاله هذه طائفة
نسایه مخصوص اولان البسه آداب، حفظ
الصحه کلیاً مغایردر. قادینلر هم ارککلرک
شهوات نفسانیه سنی تحریکه سبب اولیه جق،
همده حفظ الصحه موافق بولنه جق صورته
تلبس ایتمه لیدرلر.

دوشیزکانه مخصوص اولان تأسیسات
عمومیه ده ویریله جک یمک: (چوربا، سوکوش
وبرآزده چرز) دن عبارت اولمالی.

طالباتک محافظه صحتلری ایچون رقص
لازمسه ده اوپه را رقصی کبی اولمالی.
قیزلره قانون واهمالی شیر چالدرمالی،
موسیقی تعلیم ایتله.

قیز مکتبلرنده مدیردن باشقه ارکک
بولنمالی. داخل مکتبه هر نه بهانه ایله اولورسه
اولسون ارکک صوقمالی. حتی بانچوان
بیله قادیندن اولمالی.

طالباتدن برینک زیاده خسته لاندیه سی
اوزرینه کلن ابوننک قبولی جائز اوله بیلیر.
سده بیوک بر مقامدن مأذونیت استحصالی
اقتضا ایدر.

قیز مکتبلرنده خطابته، توزیع مکافاته
لزوم کوره م.

خطابته لزوم کوره م: چونکه بر جمعیتده
نطق ایرادینه مجبور دکلملردر. توزیع مکافاته
حاجت کوره م: زیرا مکتسبات علمیلری —
هر دالان برر چیچک قویاریرجه سنه —
پک محدود اولدینی جهتله بین الطالبات رقابته
حاجت یوق. ایجابنده مدیره نك جزئی
تأدی، لسان مناسبله بیان محظوظیتی کافیدر.
بو بابده ده زیاده بیان مطالعیه و قلم
مساعدا اولمادینی جهتله نواقصنک اکالی
مأمورین عائدسه نك هم وطنروریلرندن
منتظردر. مصطفی فاضل

— — — — —

آداب معاشرت [۱]

هر آدم شو عالم انس ومعاشه کلدکدن
صوکره بی نوعی آراسنه کیره نك متاع دنیا
داد وستدینه باشلادینی کوندن اعتباراً ابنای
جنسیله خوش کچینه نك ممکن اولدینی قدر
حسن معاشرت و آمیزش ایله مک وجوبی
یا بالفراسه درحال یاخود بالتجربه آز زمان
ایچنده حیس ایدر.

بناءً علیه هر فرد ایچون الزم وحسن
اخلاقه اهم اولان حسن معاشرت آداب
وشرائطنه متعلق دأب وادب عربی حاکی
کتبدن بالاستنباط برقچ سطر یازمق ایستهم.
اهم آداب الفت ومعاشرت: «کوزل
خویلولق وادب وبشاشته» اوله بیلیر.

نتیم حضرت جابر (رضی الله عنه):

[۱] «ایوب صبری» پک افندی برادر من طرفندن
اهدا پیورلشد.

کوروشوانجه ابراز بشاشت ایتک بولوشنجه
همدست مصافات اولق اخلاق انبیادن
اولدینی فخر کائناتدن نقل وروایت بیورمشد.
بوصفتلره متصف بولنانلرک مجامله سی
دأماً اعداسنک خصوصه تنی تحدید وتبعید،
تعديل وتأجیل ایله برابر اوداسنک محبتی
ترید وتأیید ایله جکنده شبه یوقدر.

الفته عائد احاسن اخلاقدن بری ده:
محافل صحبتده خیرلی سوزلره اظهار آثار
سرور، خبر شره ابراز مأثر حزن موفور
ایله مکدر. بوخاق حسنله متحلی بولنان قعقاع
بن شور هذلی حقنده انشاد اولنان شو:

ضحوک السن ان نطقوا بخیر

وعند الشر مطراق عبوس

بیت صواب انما، الحق تطبیق اعمال واحواله
سزادر.

حضرت ابن عباسدن مرویدرکه: بنمائه
همیزم انس وتحبت اولان ذات ایچون عهد
تریتته مترتب اوچ وظیفه واردر:

برنجیسی بکا اقبال توجه ایله دیکنده
آنی اونوتماق؛

ایکنجیسی برلکده بولندیغز زمان
راحت اوتورمه سی وسائلنی استحصال ایتک؛
اوچنجیسی سویله دیکنی باکال دقت
دیکله مک خصوصلیردر. حقیقه بر ظریف
مسافرک جلب توجهنه اعتنا؛ سوزینی اصغا
ایتمه ک قدر خاطر شککنانه بر معامله اوله مز!
ای بر مصاحب منبع طیب و صفا؛

کوتوسی ایسه عین اذا وجفادر. جای تردد
دکلدرکه برادیبک بر شخص ناتراشیده ایله
مصاحبتی جهنم عذابندن پکده دون قالمز!
مزایای حسن الفت مالک اولان کسه
— باد جنوبک سحاب و غمامی تصرف ایله.
دیکنه مشابه بر صورته — قلوب ناسی ید
تصرفنه آلمه موافق اولور.

عرب، انهای ملاقاتده انواع دعوات
وتحیات ایله یکدیگره تلطف وتلطاف ایدر.